



祈安遺集



元進士長沙陳泰志同著

鄉貢進士曾孫朴



鄉貢進士教諭玄孫章訂定

賜進士第監察御史來孫瑤刊行

賜進士第內江知縣來孫銓重刊

天馬賦

考試官批氣骨蒼古音節悠然疑熟於楚辭者然不免悲歎意疑必山林淹滯之士天門洞開天馬可以自見矣

若有龍兮渥洼之子滎河之孫批便奇崛產自月窟
來于大宛筋權奇而虎脊兮肉磊砢而峰巒精神變
化不可測兮上貫乎星房之垣朝發滌乎河濟兮晡
沒影乎崑崙雖有銜勒不暇顧兮彼輿隸其焉能援
批筆氣飄々惜遭時之孔阨兮伏阜樞而中顏隨驚
駘而並駕兮又或驕逞而相欺啖芻菽而不飽兮羗
豆菽之可期輒鹽車而登大行兮路岑崑其險崎義
和迫而將晏兮勢蒼黃而摧萎批讀之悵然翩々之
伯樂兮道安適而逢之汝然為子涕兮爾何困乎此
歎批奇氣可掬世貴賤之不分兮信焉用夫駿為解

劍佩以為質兮吾將待子而西歸欲掃空夫大漠之
野兮寧轢玄圃而騰崦嵫不然乘雲躡風載周穆而
遠覽兮造王母乎瑤池於是天馬俯首噴沫振鬣仰
吁物固各有所遇兮遇固各有時向微子之超越兮
肯委絕其誰知批有司雖非伯樂能不為子刮目耶
縱逸氣之凌厲兮獨不為子而徘徊倘一試而遽舍
兮駕鼓車兮何悲伯樂復歎而為之歌曰批可謂寸
駿天馬兮風駿批竹耳兮夾鏡瞳少不自見兮老愈
工嗟哉贈蹬兮吾知爾之為龍

留別歐陽玄魯伯昭二同年

麒麟骨骼虎豹文當年湖湘談兩君胸中磊落富經
史豈獨下筆空凡群貴戚權門皆倒屣南北風雲會
於此談笑真堪魯仲連風流亦到歐陽子玉堂萬卷
圖書新冉、翳鳳駘星辰天孫雲錦不浪織帝傍已
染紅薇春我身亦生大國楚尊前作歌能楚舞屈原
賈誼今已矣世間人才吁可數

題趙子昂畫馬歌

九原駿骨埋地中一夕盡化霜皮松畫史刻松作神
墨掃出麒麟帶松骨烟沙漠、披風鬃精氣烟、房
星同天山無人草木白西極日沒黃河東時平使汝

困轅軛不得變化騰為龍黃金擲送燕臺下當日君
王惜高價自從汗血去人間老死英雄空見畫千年
祇說曹將軍弟子韓幹終無聞今之畫者趙翰林嗚
呼三晉賢子孫

贈思齋郭處士

先生奚為箕穎之清幽忽思洞庭衡岳而南遊南方
風氣未宣泄浩與嵩洛相沉浮二百年冠冕黼黻亦
已極猶有存者弘璧琬琰琳琅球先生志趣好奇古
欲使天祿四庫躡藏收天高日月衛辰極五十五度
當中州遺經不肯列韓魏精舍徑為河南脩郭大梁

人今擬創河南書院集羣書於彼河南司馬溫公二
程夫子克夫先生也吾聞清廟貴茅屋丹刻瑜制非
前猷周公不公孔不丘悽愴誕幻蛇為牛撞鐘吹螺
日鼎食紺宇珠蓋王公侯朝神雨露不分別稂莠遂
勝嘉穀秋我居道德仁義宅竊為祿補中心憂先生
但看持鉢化圖構梵刹為身謀其徒數千人遮道更
唱咻高明之室鬼所闕頃刻布地金錢流嗚呼民生
衣食唯粟帛獨不念靈光殿古梁棟折

贈琴士呂中谷

象環樞具青綸巾路人喚作回仙人
茆君洞裡醉千

日至今彈得華陽春我貧無琴亦無酒提壺問字皆
琴友三杯一曲墨淋漓白雪飛滿晴牖前年醉倒
蘭溪邊水雲沃以松風絃醒來月色浩如瀉今夕對
月空潛然嗚呼水雲不復起徐公樂章呂公指雖無
老成有典刑為我臨流瀉秋水

秋江釣月圖歌

秋谷李平章所善客鄱陽葉天文隱居不
仕其行卷曰秋江釣月圖今年魯伯昭濶
里吉思贈之以詩屬余次韻

青蘿斷岸苔如髮天清水落魚龍窟
中有江南漫浪

翁獨掉秋江釣明月秋江月白芙蓉深扣舷夜和江
神吟不須槎上泛牛斗瓊樓玉宇空人心千年白石
今可煮一掬泉香搗雲母富貴知君已獸看翠黛紅
粧夢中舞人間月色儘風波聞道君家月最多我亦
扁舟下彭蠡到門相訪定何如

將離京師別李朝端陳伯奎二同年

陳生射策未三十筆箭如鋒不破的自古英雄感慨
多直比臬盧懸一擲文章有命不論巧得喪窮通兩
何惜吾州二妙真豪放白壁明珠炯相望蜚英已邁
時輩先通籍還兼伯兄行霜蹄歷塊千里空風采承

思九天我辭君歸春正晚天風吹飄落花滿青冥
浩蕩南極深白日波濤洞庭遠感君惜別重徘徊今
我長歌激肝膽雲山之東佳氣濃磔裂華蓋晶熒通
紛鸞鵠好羽翼莫笑垂翅南飛鴻

朔方歌

朔方大野何寥哉悲風慘淡從天來初如巨壑吼陰
浪忽似暗空行怒雷嚴風吹霜石為裂浙瀝飛砂砭
人骨萬里書生二十餘疋馬來為朔方客朔方之人
膽如斗不關才華鬪身手無復悲歌慷慨聲猶能使
氣屠鷄狗憑高仰視太行山、氣空濛紫翠間東西

日月自吞吐今古烟雲相往還太行勢盡西山起鳳
舞龍蟠聳神偉昨夜燕支雪作團散落飛花漢宮裡
朔方猛士氣凌雲白首防邊未策勛馬上相逢泪如
瀉嗟我何為朔方野

與同年鄒煥同歸舟中望太行山和前韻

我行訪道真勞哉豈意萬里逢君來琳宮誤落丹篆
筆驚起電火龍池雷龍池雷息丹篆裂蝕食真詮竊
仙骨投筆歸來帝未知長揖金華紫微客相携歷井
捫箕斗側身太行一揮手俯眎蒼茫八極深始悟丹
經一芻狗舊傳石髓在茲山愴恍靈光石縫間可憐

中散嗟不得王烈一去何年還九原劫灰無日起我
獨從君探竒偉君知混沌非死生我亦空同無表裡
哦詩寄謝山中雲采芝種朮非殊勛太行山傾河絕
瀉此時正到無何野

邯鄲道上書所見

馬羸、車碌、古道茫、砂撲、帽翻、袖速、丁
丁零、西番經軋、刺、單于曲西番經無人聽單
于馬上琵琶聲烏紗辮髮雙娉婷不知是河西不知
是女真有時喚驢兒玉色微生嗔東風日暮邯鄲塵
去、共踏長安春往來只在都門下可笑相逢不識

君

雙瑞吟

平水張仲彬余同年友也男女同日而誕詩以慶之余昔為張贊梅竹云吳門幽栖不可奪志付之和羹正在爾子一竿兩竿籜龍晚

早生男晚生女早晚參差嫁娶羨君男女同日生
嫁去娶歸無可慮君家生孟勛力強抱哺喜聽啼宮
商高堂記我梅竹讚大笑此識非詩狂君不見鄴城
斗牛結雙瑞一朝飛入延平水一雄一雌本同氣復

來平水為兄弟張公神物會有時雪花芙蓉照天地
樂哉張公我同年我今入室憂綿綿封侯作妃兩不
願但願多種南山田十年生老京華擅西風落木行
湘川別君上馬且歸去嬉笑牽衣亦可憐

贈張仲彬黃石公素書并文昌像

贈君留侯跪履幽渺之遺編侑以文昌示像天矯之
飛鳶兩公往者為時出蒼姬再造矣劉端浮漚變化
不離世而我未見徒長嘆世人欲學不死訣強以體
殼留神丹豈知英槩自不死明月照海秋空寒前身
孝友侯者仲後身忠憤人書韓君胡為乎雲山之間

雲山之間七十一峯下有七曲橫江子房赤松乖崖
霜後鷹希夷霞外鴻又何必華山白雲千里萬重携
吾書兮吾山中爾從兩君兮或往或來躡層冰而把
芙蓉

雲朋歌

蒙古字學汪椽婺州人扁其室曰雲朋將歸
江東索詩為別因賦雲朋歌以餞之

九疑冥冥天素秋大江茫茫東海流竹黃梧老鳳凰
愁白雲孤飛誰與傳金華弄人弄桂舟翩然乘風來
遠遊酌子一盃酒送子黃鶴樓古來管鮑餘荒丘至

今寒松相蔭雲相酌高山黃綺成長往富春羊裘空
悵望安得變龍蚤盍簪與君共致青霄上

梅南歌

陳椽南仲種梅滿屋扁曰梅南介其友譚志
仁求詩於余作此以贈之

空山舊種江南春含烟照雪疑幽人幽人自看種梅
趣醉擁瓊樹歌香巾去年隨春過江北十里春風杏
花白北人不慣種梅花失笑南人惟看雪梅南仙兄
乃爾奇傅岩骨相吳門姿上書未可掛冠去要見着
子和美時

碧雲引 贈相士高雲卧

碧虛道人結茆屋千箇萬箇琅玕所碧水冷、冰雪
生虛中蕩、乾坤宿風吹碧雲行竹間時與白雲相
往還道人振策出雲外長笑始知雲未閑華山高門
不閉頭髮鬢鬢吾欲睡被渠苦勸出山來面頰無光
眼睛翳試問渠又無語一碧虛明或歸去桃花流水
幾春秋如此天地吾何愁

梅花五友圖

古人一水畫十日今我此畫凡幾筆生綃數幅畫水
石獨立寒梅妙難識當其痛飲三百觴胸蟠勁氣不

肯降龍牙弄泉啜白雪鶴翅振漢飛玄霜瀟湘之濱
渺平楚望美人兮在南浦夢回殘月照寒衾忽見瑤
臺淡粧舞此時見畫心悵然吟蛩落木秋無邊化工
知我惜花意墨香到骨花能言長松飛來蹙成卷竹
色蘭芳靜相見吾廬雖小物色多不待更買鵝溪絹

黃石歌

黃精瘦硬無人食后土藏形化為石元氣冥、兩竅
通照見日月相出入劉郎天台歸赤手把突兀山神
夜醉失摩訶洞口朝吟空嘆息蘚痕蝕盡花雨乾三
月桃膠凍蠶蜜請君愛護雙玲瓏菖蒲綠葉搖春風

試采松根煨石髓杖藜同訪穀城東

松障圖歌

何人獨立身堂。十八公子鬚髯蒼凝冰不遣勢摧
折清籟時與髯低昂蘭為兄兮雪為友燕坐松間自
呼酒眼花耳熱鱗鬣生千尺龍蛇入揮手。中松月
自離筆已見雲烟生翁鬱倘非白晝堂宇空真恐幽
陰鬼神出平生始識顏平原堅若絕勝甜中邊世間
畫史千金價惜哉此松不多畫

牧牛歌

我昔維舟彭澤縣東村西塢都行遍茅屋深林十數

家數家茅屋連秋甸老翁七十裝笠歸門外繫牛桑
下飯平原過雨草生香遠岫餘暉烟似練牧兒騎牛
不知倦吹笛山前任回轉自矜牛背穩如舟我笑舟
行命如綫况是閭閻日相見辭家萬里非吾願非吾
願歸來耕稼逢秋早田間對畫空三嘆

紙帳歌和全初上人韻并東劉光朝時朝納寵
故戲之耳

道人於事百不聞歲晚鶴骨誰相溫禪床璽光薄如
霧宜月宜霜復宜露夢回蘄竹生清寒五月幻得梅
花看初疑脫膜輕無力一片凝秋剝中色道人巧手

天機深兩杵獨伴階蛩吟卷舒似聽桔葉音珍重莫
遣烟煤侵百年富貴誰能免錦幄形廬語恩怨可憐
老楮歲寒心用舍在吾難自薦君不見燕山穹廬擅
百幅狎坐圍春醉紅玉道人不學製戎衣空煮南山
卧茅屋安知幕天席地一希夷長共青山白雲宿

湘雲歌贈蕭湘雲婦宜春

宋玉當年作雲賦夢中直與雲相遇心雖拳、未忘
楚何不放雲出山去徒使襄王朝、暮、行雨處君
家西江西合共西雲住胡為獨愛湘浦雲姓字幡然
不分付吾聞宜春舊湘色無乃湘雲返其故又聞昌

黎逐東野四方上下雲同趣君縱不來雲亦度洞庭
波寒秋葉稀湘雲冉、生君衣岳麓峰前呼白鶴啣
出滄洲老子明月隨君歸湘雲吳雲誰是非

天嶽圖歌

雲間康練師來自岳陽稱其友蔡素蟾好道
之薦乃作天嶽圖以寄微余題卷末岳陽予
舊游也爰集杜陵句以贈之

知君重毫素好手不可遇壯哉崑崙方壺圖對此興
與精靈聚雲來氣接巫峽長影動倒景搖瀟湘、妃
漢女出歌舞矯如群帝參龍翔大江東流去忽在天

一方初月出不高照我征衣裳憶昔北尋小有洞青
楓葉赤天雨霜先生有道出羲皇晚有弟子傳芬芳
神仙中人不易得今我不樂思岳陽蔡侯靜者意有
餘戚聯豪貴耽文儒致身福地何瀟爽幾歲寄我空
中書

蘇公穎湖觀月聽琴歌

使君畏謗如畏虎一生坐詩招謗語使君得穎如得
詩日、穎湖作詩主湖邊月落秋聲乾盡船徑作三
人看小兒解事咲起立我琴正要秦君彈可憐彭城
不肯飲對月吟詩骨清冷曲終月落讀渠詩憂樂死

生真幻影舉觴酌月、豈知三百年後我爾誰君不
見紫麟山前湘水碧一笑相看月應識

引龍珠歌

龍溪譚 輔堊其室於歙湖之北於穴中得
異石焉喜而名之曰引龍珠求其友作詩索
予和之

歙湖之陰龍蛻骨常見群仙與龍集一朝掘地得龍
珠暖霧濃嵐光不沒黃肪細滑凝土脂紫暈斜迴帶
泉脈恠來歙湖雲氣黑何代何年有奇跡乃知非龍
亦非珠玉女明星散金碧不是青囊一卷書咫尺幽

冥永相隔蝦鬚蟬眼即龍媒罔象續羊應龍出精靈
感動誰得知一笑看珠纓斷絕君不見吳城山洞庭
浦劍氣飛空人共覩當時蜿蜒顧其母一念能回帝
關虎淚花落石盡成珠石固知相比數君家兒女
亦純孝見石思親意凄楚惜君筮在中路虛幌寒
衾自朝暮蜀國蛾眉自可憐石鏡沉明照千古

桃花硯歌

陳楚材忽得一折足桃花硯作詩屬諸公和
其韻

楚山仙人百好足篋笥深藏紫潭玉泓池暖濕暈苔

青取出摩挲面俱熟我亦因之三嘆息六經曾棄咸
陽陌秦人洞裡桃花春硯石生花帶春色漂流於世
君能得研盡玄霜石為折吁嗟忠臣足見剛痛入肝
腸面黧黑晴窓再試春空雲爐烟不動紅蘭熏時平
諫草用不靈聊與騷客供吟情

奇石歌

吾鄉弥陀寺有僧藏奇石云譚樵翁故物俄
而譚君雲隱若洲諸昆季同游適見愛之及
歸各欲問道往致先為雲隱持去若洲蓋不
能平也雲隱字仲祥若洲字仲張

禪房拄杖驚衆禽咫尺嵌空生太陰諸君雅興在立
壑陡覺突兀藏胸襟自言牛李斥飛日平泉物化餘
茲石沉淪歲久雷電知迸裂湏彌燁中出金仙化作
浮海瓊異事驚起群龍爭天驚雨逗補不得謾解人
間千日醒山僧談空雨華息稽首持贈家四壁雲邊
老隱先得之竟使若洲懷痼疾蘇公正愛仇池盆晉
卿盡馬空駿奔不知君家伯仲好分許半席同朝昏
我思世味真如蠟留取寸田并尺宅它年歸卧意何
如洲上雲邊一間客

茶竈歌時寓興隆為蕭蘭雪賦

長安食肉多虎頭大鼎六尺誇函牛槌鐘考鼓燕未
足鼎折還驚覆公餗山中儒生守蠹魚一朝射策升
天衢居官廩祿不及口釜甑長年滿塵垢一貧一富
俱可傷一飢一飽俱止羊今我閉門學祀竈祠竈何
用神仙方敬為告曰竈兮竈兮但使我生不富不貧
適飽適飢朝從爾食夕從爾糜時時得佳茗與爾同
襟期君不見青原山紫芝客獨立清風洒蘭雪蘭雪
堂中一事無茶竈筆床相媚悅方其煮茶時自撫一
曲琴、聲落茶鼎宛若鸞鳳鳴客來固自佳客去情
亦適坐看茶烟靜松鶴飛相及烹茶得趣唯此君傲

晚鐘鳥如浮雲名章俊語出肝肺白雲璀璨蘭芳芬
蘭芳芬雪菡萏馮入磁甌碧香滿更從龐老吸西江
却笑玉川論七椀

南山歌贈方誠父判官

岳麓山前一葉舟夜看明月湘江流湘江月色流不
盡洞庭漠君山秋回舟喚美酒醉卧湖上樓華陽
仙人吹鐵笛吹起白浪蛟龍愁明朝布帆向何處直
到雨臺山下住南臺山窈窕路近桃花源上有冷風
之黃鵠下有啼樹之青猿君家別墅南山下翠竹千
畝如淇園昔君華首乘驄馬出掌銀臺重聲價如何

此際不相逢歲晚論文孺子亭前秋月照湖水宛
轉南山如夢裡復從此別心氤氳西山望斷南山雲
滄浪有約須乘興把酒南山更共君

擬范增碎玉斗歌

鴻門醉兮幕張黑雲壓兮芒碭臣今莊兮起舞伯何
為兮誤莊重瞳兮日光高準兮龍章風塵灑洞兮誰
虜誰王臣所惜兮惟王之玦斗可碎兮首亦可裂嗚
呼爾為漢佐兮為忠臣千秋萬歲兮爾楚無人

擬虞美人歌

項羽堅壁垓下夜燕悲歌美人

虞氏和之予因廣之云

王倍漢力王輸漢時漢購王首王出安之莫愛匪妻
莫馭匪驢不能言妾哀致辭曰星焚兮隕空
淚洒兮營中妾生誤王兮死無終楚猶競兮天回
風王乘驢兮去為寵妾歸骨兮江東

送康仁壽之衡陽

蒲之漬子所廬我朝夕游息俱今子不樂將焉如彼
衡陽為名區蔚俊彥悖詩書子之往也勿躁勿踈毋
訾毋譽一龍一蛇張歛卷舒吾送子行兮夕陽兮平
林倉庚兮春深臨觴恹兮罷鳴琴望飛鴻兮寥廓盍
寄我以遺音

九日碧溪太守秋懽別駕約會定林寺游翫座
間因和碧溪之韻

如澗之酒璫為觴山公携客酣高陽清談最喜得支
遁法雨晝下天華香當時涕泪神州冷枉煞叅軍醉
中影至今江左舊英雄猶向新亭看風景夕英可食
不可肥苦吟莫作虫聲微城頭日烜畢逋尾五馬興
逐晴雲飛百年心目易為眩社燕相逢又秋雁後來
二客記風流只有青山臨斷岸

奉和趙秋懽閏七夕樂章

翠鳳鏤、刷新羽一霎香車洗塵宇秋瓜老盡畫屏

空小扇無人拜，星渚武丁去。作宮門仙，昨暮重開青
瑣烟。長河十日一到海，三疊回波金碧鮮。剛風洶湧
太古裂，天上至尊寧晏眠。六龍西行鼓聲急，芙蓉卷
露旌旗濕。今年烏鵲最辛勤，秃尾爬沙向龍泣。祗憂
帝怒星為石，八極長懸曙光赤。鵲飛入海，未回化
石相望見何日。

謝秋嶽杭筆之惠 公乃趙故忠靖公之孫時為

茶陵別駕

清晨學作小楷書，忽有兩生來坐隅。懷中出贈使君
句，岳麓秀氣連西湖。西湖製筆天下無，我欲往至道

路迂使君蓄，縮廟堂手吏退。聊以詩為娛，臨池念我
筆。以禿傳教遣與朝夕，俱陳玄藁面畧不省。偶見拂
拭還驚吁，松雲漠漠弄幽態。妙處欲寫旋已逋，遙知
湖面好秋色。綠水一帶明菰蒲，安得從公幅巾去。小
艇盪月輕如鳧，吳兒短歌我長嘯。看君數筆杭州圖。

題蒼龍戲海圖

天孫織雲春錦紅，玉梭誤入乘剛風。一夕變化雲冥
濛，海水起立為珠宮。坐今年，机杵空誰與黼黻上
帝躬。求梭不得愁鬼工，安知入君懷袖中。

送錢塘琴士汪水雲

三十年來喪耆舊天下彈琴水雲叟猶疑朕氣世間
無自說蹉跎晚何有漢宮華麗陰貴人臣忝近歲居
宮門東觀初令習書史寶詔再直行絲綸熙明殿中
早朝罷仗內玉輦扶皇君昭容傳詔促侍燕屏棄舊
樂嫌繽紛調絃始學鳳凰語度曲便覺聲有神銀山
千片潮捲雪天馬萬匹風驅雲龍顏正色動一咲錦
幄勸醉葡萄酒春今時富貴眼看盡異域飄零心尚存
流傳弟子竟誰在散落江湖嗟獨聞人生底用誇長
健白首青衫泪如綫尊前指法闕呼韓王晚香餘夢
中見

十二月望雪集守一訪予出示一木禪師所和
海粟玉壺歌且邀見一木談話臨別補韻以畚

為他日證印張本云

高人未厭枯槁質白雲舒卷世莫識凌雲跨海玩九
州咲指須弥去天尺法筵龍象精護持千萬人中初
見一分明一木在手中肯為傍人更拈出入門載拜
麻衣僊竹爐芋火深無烟
天眼有活法疑我骨相非仙緣空堂梅花淨寒玉暫
借蒲團參一宿諸方大義杳難聞直把真源到凡俗
清夜瀾翻舌如水狂花洗盡今餘幾人間功業等飛

塵往、積聚成高陵安得慧劍光凜然時起頑鈍相
磨鑄幻身種、是煩惱偶見華髮驚行年寸田焦枯
不生穎性天一失何由全窮是雖窮亦有福我願携
鋤耕衍沃問師此去來幾時明月干江同一掬來時
問我事何如擁褐裨床食糲粟逸床試作獅子声顛
倒虛空自捫腹世人唱曲未知宗更向誰家覓机軸
與師携手遊青都太古一息天為徒還丹臭腐今已
無為公錫却壺公壺

丁都護

城西夜歸成婦孀哭甚哀為述其情

丁都護妻夫已死長辛苦結髮相從畏別離身不行
軍名在府去年為君製袍衣期君報國封侯歸紅顏
白面葬鄉土反媿老大征遼西遼西縱不返馬草垂
千年君今葬妾手空受行伍憐相思墳頭種雙樹慟
哭青山望歸處妾命如花死即休兒女呻吟恐無據
當窻玉龍鏡焰影弄春妍團圓不忍見結束隨君還
願持鏡入泉下土照見妾心千萬古

醉書王玄德德聚亭

前日相逢一樽酒即欲寫向君家亭別來十日不會
面胸次碑兀愁難醒憶我曾為帝城客、裡論交話

疇昔玉樓絃管天下春醉舞楊花日西夕此時聚首
情皆真雲萍轉盼難重陳高官坐揖小官拜九州四
海知何人長安少年更翔薄一餉飛蚊聚懽樂殘盃
冷炙心已悲此士平生慣藜藿君不聞漢時豪傑稱
東方列卿太史尚書即就中亦有貧賤者感動星宿
回清光為君痛飲亭邊月懷古傷今重離別丈夫有
志江海深匣中雄劍知君心

嗟哉行和周卓翁韻

吾聞子房一身皆俠骨萬死計中無一活當時志在
報韓仇四海無人九州窄又聞荆卿重義世無有擊

筑悲歌一杯酒當肯感激為燕丹可惜臨終無好手
吁嗟今之人何登天兮攀龍而走山兮騎虎世事良
難獨輕許感恩報怨兩俱非強弩千鈞博鼯鼠東家
嬉笑西家哭朝見揚眉暮顰蹙綠珠樓外斷腸花紅
蠅帳中流淚燭檠枯代謝皆如此遺恨姚黃羞魏紫
古來賢聖少成功不及乘雲廣成子櫟雲如幕洲如
雪卓翁哦詩真卓絕眼看齊楚等樗蒲楚夫未應齊
獨得雲來南山巔雲去北山麓種稻盈田稻苗綠願
雲作雨我田爾絃自直兮爾鈎自由
送耒陽劉百川時為余領耒陽而歸就赴永岸

君辭蓬萊歸幾時我住空山那得知城南斗酒醉風
雨春透兩頰冰融鬢長卿凌雲我何有萬里功名新
入手著身天地即英雄忠孝千年堪不朽君方欲識
顏平原我亦想象元次山浯溪石刻照肝膽勁氣長
在滄浪間驛亭梅花蘼溪水明朝紫薇雨當止梅邊
更說杜陵詩青眼高歌望吾子

聽玉壺彈琴

玉壺彈琴彈入風雷引六月涼颼吹酒醒忽然霹靂
三四聲雨急軒窗色淒凜又為我彈箕山中落花
人意閒松風撼、度澗水彷彿猿猱啼空岩長清短

清取次彈雲影蕩漾生秋瀾我為玉壺草數幅有聲
無絃、陸續相約扁舟駐華亭雙鬢侍立長眉青天
台綠蘿懸桂樹更携此琴淅東去

貧女行

貧家養女纔十五手足如綿獨當戶阿爺前月去行
商小弟伶仃未離母筠籃日暮挑菜葵倩人遠糶防
朝炊簪花枝重黃垂額汲澗泉深綠照眉生時不得
嫁時力却喜夫家慣耕織堂前奉養老姑存姑為艱
難少顏色夜來小弟報平安見說新年百計寬此身
豈願獨溫飽父母養我良辛酸

翁仲行

白楊祠邊石翁仲雨濕苔痕宿泥重前人骸骨後人
心丘隴華堂死生共盛時出入多弟兄身騎廐馬千
黃金年、酒肉醉寒食祇恐春風霜鬢深春風無情
謝桃李流落空阡轉隣里、中前日賣漿兒蕭鼓還
未塋新鬼草間翁仲何足論榮枯萬事隨乾坤田文
撫劍生怒嗔一朝慷慨彈雍門

題劉光朝小景圖

時光朝得美寵於武昌善琵琶

就戲之

江雲慘淡江風驕欲行不行誰度橋舟中漁父晚更

急賣魚歸來醉無力漢陽城郭鸚鵡洲我昔曾泛馮
夷秋如今此景是何處擬向劉郎辨煙樹

題劉光朝歸牧圖

平湖草綠生春烟斜陽牧豎乘鳥捷日光不動牛背
穩後者喘息長繩牽吾兒讀書懶更魯少小嬌痴那
似女微官食祿能幾何歲、羸駝踏風雨

題東野石園阡

君家烏石園頭路奮日空阡今日墓幾看高塚卧麒
麟誰似松楸馴鹿護客來亭下讀新碑颯、西風吹
蒺藜但使靈祠歌舞在百年荆棘路應迷

題安成趙如心孝感集

君家此集定不朽前有紹興後德祐喪亂干戈何世
無往中間看愈醜嗟哉祿養本人情豈以不幸為
身名我雖異代偶同感仰眎木風空屏營

三月望日攸輿楚昭王廟觀樂舞以落花遊絲

白日靜分韻得靜字祠稱楚昭王聖帝

吁嗟人暴今方定同姓秦徐異哀盛君看竿屈復何
存猶有遺民奉昭聖晶熒丹碧飛甍間彷彿章華渚
宮靜四時歌舞尚巫覡三月鸚花滿城徑駢弓寶校
爭曉出錦帶宮袍與春映卷髮盤龍劍士高細腰勒

馬宮城瑩熊君珥貂當警蹕鷺序稱鷓儼朝覲麾幢
影散綠雲飛絃索聲遲玉簫並我聞神靈本正直恐
有憑依駭觀聽春秋未許僭王章尸祝寧應竊天柄

李陵縣軍遇敵圖為秦孝先題

壯哉射虎將軍孫惜哉扼虎邊軍魂旌旗半捲日光
薄風吹野水秋無言生降孰與死戰樂天子未負將
軍恩陣前八駿血為淚仰白不見咸陽門祈連山頭
堆首藉將軍多馬今何贖

謝主簿有客曰李玉田隨君之京詩以為贈

大江之南長淮之北衝波浩蕩雲溟濛連檣掛席萬

里餘安得附翼於飛鴻謝公俯念老賓客玉田致以
任安翁歸來東南月半弓賦詩一二當群雄戰場妙
思古有法嘆息羿毅良無工背城不肯合餘燼徑欲
射策開天聰便有九事八為律造物亦蘇入窮燕
昭臺前送落日望諸祠下吟春風臨岐贈君鐵甌粟
他日歸來思老農

為秋堂題錢舜舉所畫吳興山水圖

畫師小景如傳神自昔水墨無丹青老錢變法米家
譜妙在短幅開烟屏烟屏咫尺互明滅赤城霞綺山
陰雪松風四月五月時坐定還疑棹歌發秋堂吏隱

洪堂都對畫却憶蓴絲鱸吳興山水雖可摹老錢丹
青今世無

飛電引 寄簡魯樵雲祈雨有感

昔君賦魚有靈夜扶震電飛蒼冥我藏君字入匣
水墨光劍氣奔雷霆龍因此却相妬訶叱雷電閃
烟霧陽烏薄蝕朱鳥宮焚惑憑陵赤蛇度綠章封事
朝九閔帝意鴻濛闇者怒客從清溪上來為言明
府何奇哉清晨坐衙晝飛檄席卷太乙三山回怪來
山前雨不過社鬼山靈獨欺我鳳岡熊喚百里間飄
然忽西無不可遙知組轡行秋田老翁拜迎桑樹邊

虎髯堂、有仙氣平原魯公作雷吏

贈譚海陽祈雨有感

東南夏旱天所惻豈為凶年惜甘澤南雲老守叩天
公欲使疲民解飢色紫麟拔秀神所都中有海陽老
人之仙宅海陽一生詩酒賜藉以麩藥和天漿三更
擲筆走風雨鼻息無声雷殷床蛟龍入袖誰敢索但
見統屋飛琳琅天明鐘動官長集雪浪翻空泥一尺
海陽熟睡都不知清夢正到華胥時夜來好雨百事
足稻花吹香稻苗綠

漁父詞

蟬聲欲斷虫声悲江天月上初弦時漁翁身老醉無
力矯首坐看雲離、痴兒不識老翁意苦道平生貧
作崇賣舟買得溪上田昨暮催租人已至君不見長
安康莊九復九兩笠烟蓑難入手人間萬事誰得知
滄江夜變為春酒

全張秋海飲酒黃家樓和周卓翁韻

秋山木落黃樓高晴光潑眼如銀濤看君妙句傾瓊
液涼州不復誇葡萄人生相知一杯酒千載陳張吾
何有章臺走馬春意深莫遣飛霜到蒲柳想君一別
行路難留君更醉瓢亭間瓢亭梅花好風月跨鶴重

來更栖息

龍南縣早禱于沈公石室有感

黑雲童：起東麓俄頃狂風捲茅屋黃昏雨勢盡連
山入縣滂沱四更足去年八月蝗蟲多今年奈此潦
漲何方當飢饉復憂旱蠻老唯尋干戈謠言誕漫
供難聽群吏詢謀起余病沈公遺跡在前山有念叩
之無不應我窮落此荒隅中豈意神交得沈公願香
未息甘霖注如此嘉惠慚何功崑苒古祠空餘竅我
欲題詩沈公笑至人應物自無心歸路聯翩月相照

贈遊學李生

隙光漸暗雲垂、啾啾凍雀黃桑枝銅鑪茗碗共危
坐敲冰作雪廬陵詩門前滄浪江水濁門前新豐市
酌薄明朝南陵有新作天台故人待高閣
周谿南諸公游龍湖時予以病不偕和谿南韻
我家衡門接遙碧曾約溪南螭雙屐花時不往今已
秋縹緲望君空佇立山非棄人、棄山三百六旬何
時聞風吹岩瀑洒飛雪羨君此日起人寰溪南英姿
古仙客更許龍湖弄明月雷公雨師莫久留白石清
泉吾欲得

贈孟守容齋

漢世循良誰與儔孟舒素業傳吾侯雲陽久矣無善
治高者慘刻卑貪偷詩書大體厭迂濶几閣細故窮
咨諏美科無常板籍廢紀綱攸斃衣冠羞更張治可
用重法如病沉痾今公瘳七年府推芋魁飯昔似臯
陶今鄭產吏畏蒲鞭祝頌稀民思襦袴吁來晚薄俗
那知德化尊老成依舊典刑存山中幸有寬閒野歸
種甘棠敬子孫

萬里行

恨身不及生北方出門萬里無贏糧飢鷹志豈在狐
兔日暮啄雪猶彷徨早年結束恥游俠絕處季孟并

李陽樗蒲又不學劉毅百萬一擲生輝光縱鱗暫脫
騎鯨勢弱羽徒干薦鴟章門下雖通齊相國馬前難
拜北平王歸來把鏡但搔首科斗虫魚負君久金章
一咲雷電奔我豈終身合箝口錦媽鴨綠芙蓉秋航
船卷月秦姬樓蛾眉為我歌世事何必愁東邊日出
西邊沒南北生人俱白頭

別友

山中兮清猿澗溜兮寒泉白日忽兮下照耿將判
兮何言嗟公子兮豹袖愛我兮操執子之手昔河間
之濶兮躊躇又不久曰吾愛子之館兮阿丘之隅彼

場有藿兮可繫爾駒
矐子佩此盟兮欲停征而返顧
恐飛潛之異趣兮孰將憫吾遲暮
望美人兮浩歌翳
明月兮松蘿遐不念兮公子撫長
缺兮蹉跎

贄呈平山王萬戶

將軍壯年不可羈走馬直上長安西腰間白羽淨如
雪教助咲射雙狡獬者中大舅汾陽子文彩風流
當世西家勛業冠麒麟晚覺王郎更相似去年引見
蓬萊宮雲衣跪捧瞻天容歸來三軍盡呼舞葛巾羽
扇生清風將軍談兵用儒術幕下書生劍三尺槐陰
滿地綠如山醉撫桓箏看空碧

次仲止秋蓮韻

故人別我烟水長獨愛雙井秋風香朝來遠寄湖上
作中有片花雲裳幾年此花墮結息一落南國愁
荒涼平生薄命是天意未死何處無幽方中有娉婷
美絕艷嫁晚索莫羞時粧君不見魏家湖裡載歌舞
盪船不識誰家郎未闌玉砌坐凋歌惟見野茨生中
塘風流隔世在我爾貧病願欲辭盃觴欲將此語憫
今夕誰遣露華悲清商明年烟水我更遠逸亭紅綠
君無忘

魯山以筠櫛見惠侑之以詩因韻為謝

平生羨支離粟鍾薪十束肩高或踰頂會撮不諧俗
爬搔既無施垢膩常所族故人相摩 蕪穢胡不斲
試將千畝春為製五穀王霜姿削廉剴風氣合清穆
踈疑雪照綜密比生綃幅紋深髮漸稀技癢心屢覆
雖云斬遭澆竟使光眩目可憐中書君潦倒賜休沐
脫巾謝僚友領此分禍福何嘗勞念漬以爾供奉續
今晨獨何幸偶入鯨仙錄承言受何貺但願咲予禿
更欲洒松風相從竹溪六

感寓

中道迫生理憂患未渠央用此較古今常疑今世長

息肩幸一憇忽已鬢髮蒼顛倒百年間悲樂安可量
夢中逢故友相與傾壺觴舉觴夢即覺此酒誰復嘗
草木依寒暑榮悴尚有當人生顧異此弱質徒皇
喬松不可願放志聊徜徉

劉光朝席上和龍琴臯韻并簡和龍川

山中欲歸可歸可遲暮雲在襟袖亦有重來期劉侯
好兄弟斗酒相怡、風流賀監山陰雪乘船馬上青
雲姿忽疑鑑湖日又似天台時琴臯仙我為雲爾為
龍願得千里萬里長相從人生離合誰得知山中且
歸為君更換丹青師畫出尊前一段奇

謝送崖公所畫判官藥方書

我從海上歸不得，海上方庸醫。試喙吻食之，斷人腸。
我從濠梁歸不得，濠梁畫詩情。勃鬱時強走，何由化。
空山欲雪雲冥冥，道逢裘兄雙眼青。收方蓄畫能通靈，
快我詩贈憑丁寧。君持此方為國醫，黎民要使藥籠皆。
參苓君持此畫獻賦凌烟閣，要使天下將相皆。褒鄂海頭不生斷腸藥。

集民謠

其一曰苗青

苗青、東阡西陌苗如雲，經年不雨過秋半。苗穗不實，空輪困田家。留苗見霜雪，免使糶歲勞。耕耘縣官

催租吏，胥急糶粟輸官，莫論直勸農使不汝恤。

其二曰蕨澄

蕨澄：新春食蕨留蕨根，凌晨刷根暮春杵。漱大甕流黃，渾常年春寒粉始凍。誰信秋暑霜翻盆，窮通有數，今已識為死為生，尚難測。獨立蒼茫面如雪。

和陸放翁白苧詞

美人獨宿青樓空，素烟不斷楊柳風。含情脉脉，剪刀裡一片湘江明。月中去年秋，機織雙杵裁寄征夫送。寒暑望斷遼陽信，不歸長夜停梭聽鸚鵡。

渭城雨

瀟、不盡陽關

柳此地行人一杯酒行人漸遠征袍乾添入何堪雙
泪彈

秦淮月

沙頭薄暮生林樾烟水茫、沙雪白女牆夜靜潮無
声惟有中天一片月年、故宫照禾黍年、商船照
歌舞

蘭臺風

渚宮飄、泛崇光青蘋吐花生晚凉犀帷忽動懸璫
語嫋娜腰肢欲輕舉吹雲吹雨暮復朝湘蘭吹老空

寒、

陰山雪

漢家將軍愁失道關氏半夜雙蛾老祈連千丈酸風
高日、鑼車翻海濤誰憐中郎齒如戟誰憐昭君髮
如漆

夾列門故宅

北園之東隅數株桃與李上有黃落實下有羅生綺
金窓綉戶綠珠樓萬草千花盡情綺秀眉窈窕揚袖
中起手彈箜篌不見纖指一彈壽主君再彈壽帝
子願君日醉千石醴玉骨童顏鬢垂耳楊花雪盡草

連空高樓月轉啼鴉起

咏雙芙蓉

雙芙蓉連理發不恨狂風傾刻吹只恐遊人輕易折
君莫折花有情不是同心眼前久還他同死復同生

賦桃實

狂風吹春墮紅雨碧蒂團香上芳樹東方小兒偷不
得暗洒齊州三士血仙山日冷一萬歲黃土清埃遮
海水海中無地種千年王母重來漢王死

偶成

濯足黃河水濯髮濟陽波清者去不回濁者其奈何

碧海銀漢落九天瑤鏡分五湖不載宮袍去咲殺江
東日暮雲

遊太玄道院訪尹鍊師琴所師詞以入室不及見
塘蒲翳晨綠迳卉分春妍入門見龕燈白日如悟玄
我從落喧囂淨地長無緣平時山中景過眼誰復憐
道人閑令家著論窮清堅荆扉圍松竹三叩神淒然
咫尺不吾論况彼飛空仙

秋陰野坐

秋陰何漫、原野終日晦形羸起彷徨悄愴若有待

山高蒼蔚尊谷狹漁樵對鷺風西北吹祥雲偃飛蓋
古來形勝場蟠屈自千載其間豪俊人生死迭相代
幽光浩無窮感發有時會若人世所乖邂逅不可再
天運豈吾能沉吟寄慷慨

客有語予以衛生之術者其說流於固賦此以

解之

宇宙真逆旅形骸同贅疣古人有至藥變臧非所憂
長生本無方徒以智力求終時受物化莽、蝶與周
無周復無蝶靈運千年儔

偕猶溪諸公全遊青原山謁七祖塔步韻

青原山七祖塔悟真寂禪師乃六祖法嗣也其
塔中舊有錫杖貝葉出塔之東為井泉者三一
曰雷湧二曰飛錫三曰虎跑清冽可愛皆七祖
所開者其初叅曹溪六祖數契合石牌上具述
張公無盡信國公文山皆有詩刻于後今併錄
之

夢裡青原四十年六朝來覲塔中仙傳燈有記貝書
在飛錫無声霜井圓石壁倚雲僧入室飯鍾紫樹鵲
通禪看碑忽悟曹溪旨擬向人間息萬緣

附錄無盡詩云

一派青原出少林信衣到此只傳心尋常示衆無人
會盡向廬陵米價尋

信國公詩云

空亭橫蝦蟇斷碣偃龍蛇活水參禪筭真泉透佛茶
晚鐘何處雨春水滿城花夜飲燈前客江西七祖家
和樵雲韻 來詩云沙溪石瀨鯨空釣蘿月松

雲鶴又書蓋余寄魯二弟用松蘿之字故魯
用以荅之

玄風遠嘆結繩初小邑烹鮮特緒餘門外樹陰彭澤
傳窓間艸色鄭玄書醉看華髮惟詩在咲撫高懷與

世疎聞道九霄鸞鳳集可能椽粟更隨狙

又

風清槐幄雨晴初僮僕炊春午夢餘鶴怨北山羈客
賦鯨歸東海故人書平生翠竹懷千古何日黃金遂
兩疎忽有侯門來報事又將中服困猿狙

遊定林寺和韻

一燈何處起千載續黃梅世與身俱幻吾携影獨來
山空鐘自響日淡鶴將回寄語沙頭鷺相逢慎勿猜
夜起

霜氣懸中夜星明動大荒竹深聞警鶴屋小近鳴蛩

寂寞懷三語徘徊感一涼隣人不同咏長笛自相忘

送友人適衡陽

好去昌吾道誰能滯故鄉壯懷雲萬里吟興月三湘
浦濶魚吹浪天低燕語樯祝融青眼在南極想輝光
舍弟至

弟從故鄉至燈下情依、書中數行字一字千行啼
因從慈母心日望夜我歸誰憐在途路歲晏迷東西

戊戌元旦

夢破空山曉晴光映竹扉一年今日始萬里故人非
受歲無貧富隨時有順違忽驚青眼在池草架依

隱几

隱几復何事欲憐還自憐夢驚渠是我坐以日為年
榆柳傳新火菖蒲灌活泉離、江上草又帶幾分烟
次胡誠齋冬至韵是日辰時冬至

按曆數開除今年尚不如烟埃隨劫盡天地入辰時
過客留題字嬌兒稍為書東隣避世叟唱好和誰歎

馬頭館居

入夏樓偏迫推窓揖遠山柳烟籠岸碧梅雨着衣班
喬木年、異幽齋日、間風流無復見坐待暮鴉還

僧房

僧房吟坐以孤枕已中宵燈盡寒侵幌梅香夢過橋
江湖殘歲逼風雪故山遙明日又行役天涯影寂寥
次尹立大韻

有力聊供世無家却累親獨憐為客意每向故人真
枕簟風光入林塘晚色新一樽誰與共愁極好生春
又

鄉閑無百里歸夢祇漫漫月色苦無奈秋聲已似寒
悟緣更事入窮為讀書寬尚有東園酒煩君破恨端

次禾川賀思明遊衡陽

青原有嘉士獨佩楚蘭芳敏手須蟾窟何心念鹿場

詞華堪應俗學業更知方早晚迎歸棹江花滿意香

送譚志仁

聚首分婚冠承家有別離故園花落後此地月圓時
適遠誰前料臨期子自思湘船半鄉邑消息定能知

元日郊行

僧房夢初醒隨意得郊行茆屋炊烟白梅花野水明
酒旗搖日影林鶴散春聲多少閒吟興東風第一程

秋夜次學靜劉先生韻

雨過月在窓竹影如掃墨起來秋滿庭露氣清可啜
列宿木末明流泉草間咽何處一聲鐘悠々度林樾

題天湖菴

交柯夢回榮禽鳥集芳樹沿溪俯清冷濯足脫塵屨
冲襟非慕禪將以淡浮慮道人下脩廊迎客吃茶公

次趙秋嶽韻

鰲魚雖快意鶴髮上

桂樹招人隱梅花讓客清

先秋分袂月

淹留久變蛇只自憐

和筠軒公子韻

公子多豪氣

成如何賦佳句亦自愛秋声

老去懷孤憤逢人愧耦耕江湖長契濶安得話平生

又

湖中為客久溪上已橋成來往扁舟意存止十載情
舊交猶婉婉稚子亦將迎祇有疎狂在後時自變更

後段盡損惜哉

所安遺集乃吾高伯祖之所作者向未刊行于世先
叔掌教華亭時適從弟仲華登進士第歸省于宦邸
欣然錄刊迄今十有五年矣不肖成名之晚至辛丑
始叨名正榜外補內江令見其舊本歲久而字畫間
有剝落者乃謀諸銀臺從弟仲廉欲重刊之書諾其
可遂捐俸銀梓以廣其傳非徒顯揚先祖才德之美
于百世正以見我後人繫衍者非水木本源之所自
與成化丁未歲八月中秋日來孫銓書于中川官舍

興海山下木崖人自中林日米部錄書于中
千百廿五以具外對人樂得者非米本亦
下邊能對錄以備其對非封醒味夫取亦
味掌錄筆專和風海軍中書人書
所安置集已音高白縣之於物會回奉附行于也



